

Minister di Energia Arthur Dowers a topa cu Armstrong y CAP

Pa discuti e progreso di e proyecto di exploracion den area marino di Aruba

E Minister interino di Energia di Aruba, Arthur Dowers, a topa cu e compania Armstrong y Compania Arubano di Petroleo (CAP) 6 mei 2025 pa discuti e progreso di e proyecto di exploracion den area marino di Aruba.

Bill Armstrong, Presidente y CEO di Armstrong Oil & Gas, a splica cu un compania subsidiario di Armstrong, esta Andicuri Oil & Gas Exploration VBA (AOGX), ta actualmente analisando, reprocesando y interpretando tur dato geologico y geofisico existente den e area marino di Aruba. E analisis completo ta tuma mas o menos 12 pa 15 luna mas, prome cu por tuma un decision y informa tocante si y na unda lo ta miho pa bora un pos exploratorio. Pa es motibo, no ta spera ningun actividad pa bora un pos offshore di Aruba prome cu e di tres kwartaal di 2026. AOGX tin plannan pa haci estudio specifico tocante e impacto riba medio ambiente prome cu cualkier actividad na Aruba, sigui e miho practicanan y standard di e industria, mientras cu ta inclui e comunidad y participantenan Arubano.

Armstrong tin un historia largo den operacion na Alaska, unda nan a participa of opera den casi 50 pos tanto na tera como den awa, logrando un record sobresaliente den HSE y proteccion ambiental den un di e habitatnan natural mas proteha di mundo. Armstrong su meta ta pa mantene e

mesun record den HSE y proteccion ambiental na Aruba.

“Nos ta hopi entusiasma tocante e potencial di hidrocarbon di Aruba su area marino,” Bill Armstrong a bisa. “Nos ta hopi positivo, y nos lo kier replica e exito cu nos a obtene na Alaska akinan na Aruba tambe. Si nos exploracion ta resulta exitoso, Aruba por haya beneficienan grandi cu por stimula e economia di e pais cu impacto macroeconomico positivo y dunando ingreso significante.”

Jeremy Croes, Director di CAP, a agrega: *“Si e proyecto ta exitoso, Aruba lo por logra independencia energetico usando un fuente di energia local, mas limpi y barata, ademas e lo por trece un reducion significativa den gasto di energia y coriente pa e comunidad.”*

AOGX a firma un “Production Sharing Contract” (PSC) cu CAP den 2024 pa exploracion, desaroyo y produccion di hidrocarbon den e area marino di Aruba. E contract ta cubri un area di 14,356 kilometer cuadra. Armstrong y su afiliadonan tambe tin mas di 650,000 acre den licencia di exploracion na Alaska, caminda nan a descubri algun campo grandi di petroleo tanto na tera como den awa, cu e mas recien e Sockeye pos, cu a wordo completa apenas algun siman pasa.

Prome reunion entre Minister Eman, Minister Wever y SMFA

DIAMARS merdia a tuma luga e prome reunion entre Prome Minister, Sr. Mike Eman, den su rol como Minister di Cultura, Minister Geoffrey Wever di Finansa, Asunto Economico y Sector Primario, y Stichting Monumentenfonds Aruba (SMFA).

Durante e encuentro a discuti e plannan pa desaroyo di e centro di Oranjestad y e rol importante cu SMFA ta y lo por hunga den esaki. Tambe a comparti informacion actualisa riba e avancen di proyectonan cu ya ta andando den nos centro urbano.

Ministernan Eman y Wever a expresa nan balor p’e trabou cu SMFA ta haci pa conserva y integra patrimonio historico den e futuro urbano di Aruba. E reunion ta marca un paso inicio di futuro colaboracion den Gabinete AVP-Futuro pa logra converti y redestina edificionan monumental, creando proposito nobo pa nan, vooral den Oranjestad y cercania, y asina contribui na un centro vibrante, sostenibel y culturalmente valioso p’e proximo generacion.

